



Namakwaland

Gabriël

Van die kreukels in die Bokkeveld
tot by die Sandveld langs die see
het die Skepper met sy saaihand
die grond sy saad gegee

Toe stuur Hy sy water waens
swaarlywig deur die ruim
Die blitse riel deur Brandkloof
die wolke gaan aan't skuim

Hy bulder deur die Hardeveld
en die Knersvlakte se droog
donder die draaiduiwels
en bliksem die tier se oog

Maar by Lutzville draai die Skepper om
na al die mens se droog en smart
en die eerste druppels in die stof
is die trane uit sy hart

By Grootvlei maak Hy sy arms oop
en sprei die gordyne reën
By Spoegrivier gee hy 'n vloed
van water en van seën

Lei kraak in die koelte
en gruis breek op in sand
Die dooie hout se skilfer
word voeding vir die land

Op 'n klipbank in die oggendson
lê die koper van kapel
hy gly die lente binne
en los sy dooie vel

En dan, ontwaak Namakwaland
soos die Skepper dit bepaal
die gebooie van ontkiemde saad
uit 'n baie ou verhaal

Eers kraak die kors klein barsies
dan bars die aarde oop!
'n Hoepeltjie van groen
word 'n mat om op te loop

Nou vat God sy verfkwas
en verf die die vlaktes kaal
met kleure uit sy reënboog
met vreugde uit sy kraal

Die Magrietjies en die Botterblom
sprei Hy geel en swart en rooi
En die Gousblom maak hy tot 'n bruid
in suiwer wit getooi

Op die kaaltes dans die Daisies
met die weste winde woes
Koggel die bye boere
wat die stuifmeel wil kom oes

Statig staan 'n Malva
in wit en swart gestryk
Groet beleefd die Skepper
wat sy gallery bekyk

En tussen die klipmos grys en rooi
met Vingervygie pret
loer 'n Dobbelsteentjie
na die Bababoudjie vet

Kokerboom berispe
die stuitigheid en speel
Maar knipoog vir die vol-lyf maan
wat sy kokerhart kom steel

Die Skepper tuur die vlaktes
tot in die Hantam wyk
Hy sien die lag en blydschap
Hy sien die kleur, en kyk

hoe uit die dorre land van gister
'n nuwe wêreld groei
Hoe uit die droogte van beproewings
waardeering spruit en bloei

